

adr-

ALTERNATIV DEMOKRATESCH
REFORMPARTEI

Groupe parlementaire



Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 20. Februar 2020

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Landwirtschaftsminister, un den Här Educationsminister an un d'Madamm Familljeministesesch weiderzeleeden.

Am Joer 2017 gouf eng Petitioun an der Chamber diskutéiert, datt méi Lëtzebuenger Produkter sollen a privaten, ewéi och an den öffentleche Kantinnen ugebuede ginn. Beträff wieren z.B. Kantinnen an de Klinicken, Altersheemer, Schoulen an an de verschiddenste Kannerbetrieungsstrukturen. Laut dem Educationsminister goufen deemools ronn 32 Prozent Lëtzebuenger Produkter an de Restopolis-Kantine vun de Sekondärsschoulen ugebueden.

An deem Kontext hätt ech folgend Froen un d'Regierung:

1. Wéi vill öffentlech a privat Kantine ginn an de Klinicken, Altersheemer, Schoulen an an de verschiddenste Kannerbetrieungsstrukturen am Land bedriwwen?
2. Wéi vill vun dese Kantinnen offréieren ausschliisslech lëtzebuergesch Produkter?
3. Wéi vill Kantine bidden zum Deel lëtzebuergesch Produkter un a wéi vill Prozent mécht dëst - opgeschlësselt jee no Kantin - par Rapport zu den Net-Lëtzebuenger-Produkter aus?
4. Ginn et nach Kantinnen, wou quasi keng oder enner 10 Prozent Lëtzebuenger Produkter ugebuede ginn?

Mat déiwem Respekt,

Jeff Engelen
Deputéierten

Gemeinsam Äntwert vum Minister fir Educatioun, Kanner a Jugend, vum Minister fir Landwirtschaft, Wäibau a ländlech Entwécklung, vun der Ministesch fir Famill an Integratioun a vun der Gesondheitsministesche op d'parlamentaresch Fro Nr. 1906 vum honorabelen Här Deputéierte Jeff Engelen

Ad 1)

An all Spideeler ginn et Personalkantinnen a Servicer, déi d'Organisatioun vum lesse fir d'Patienten assuréieren.

An den 52 Strukture fir eeler Leit (Maisons de soins a CIPA) gëtt et an all Haus e Restaurant an oft och nach eng Cafeteria.

Restopolis, de Restauratiounsservice vum Ministère fir Educatioun, Kanner a Jugend, bedreift 80 Schoulkantinnen an 52 Cafeteriaen an ëffentleche Lycéeën, den ëffentlechen internationale Schoulen an op der Uni Lëtzebuerg. Donieft geréiert de Service och nach 5 Restauranten an "DayCare"-Services d'éducation et d'accueil, d'Restauranten a 4 Internater an 2 Foodtrucken.

Eng vun den obligatoresche Prestatiounen, déi all Service d'éducation et d'accueil (SEA) ubidde muss, ass d'Offer vun enger gesonder, ausgeglachener an altersgerechter Ernährung déi op frësche Produite baséiert.

D'SEA gi vu privaten a konventionéierte Gestionnairen (ASBLen oder Gemengen) bedriwwen. D'Organisatioun vun der Restauratioun fält an hir Verantwortung. Jee no Struktur besteet d'Méiglechkeet, op der Plaz ze kachen oder d'lesse liwweren ze loossen.

Um pädagogesche Volet mussen am Beräich vun der non-formaler Bildung déi pädagogesch Prinzippe vum Bildungsrahmenplan ("Nationaler Rahmenplan zur non-formalen Bildung im Kindes- und Jugendalter") ëmgesat ginn, dëst och an der lesssituatioun. Hei gëtt net méi vu Kantin geschwat, mee vun Restaurant. Et geet dorëms, en agreabele Kader fir d'lessituatioun ze schafen, wou d'Kand als kompetent Individuum am Mëttelpunkt steet.

Ad 2, 3 a 4)

D'Organisatioun vun der Restauratioun an den Klinicken ënnerläit der Verantwortung vun der Direktioun vun de Spideeler. Si gëtt entweder intern geréiert oder d'Leeschunge sinn iwwert ee Kontrakt mat externe Fournisseure festgeluecht. An deem Kontext huet de Gesondheitsministère och keng direkt spezifesche Informatiounen iwwert d'Benutzung vu Bioprodukter oder lokale Produkter.

Ewéi schonn an der Äntwert op d'parlamentaresch Fro Nr. 1765 vum Deputéierte Mars Di Bartolomeo erwänt, mécht den Etablissement public SERVIOR zanter 2014 an der Campagne "*Sou schmaacht Lëtzebuerg*" mat an huet d'Offer vu Lëtzebuerger Produkter vergréissert. Déi 15 Haiser an de Service "Repas sur roues" vu SERVIOR bidden op d'mannst zweemol d'Woch e Menü op Basis vu Lëtzebuerger Produkten un.

An de vu Restopolis bedriwwene Restaurante ginn alleguer d'Platen op der Plaz gekacht. Déi aktuell Kontrakte vun der Schoul- an Unirestauratioun imposéieren en Taux vun 30 % fir lokal Produkter. Deen Taux ass an de leschte Joren op 32 % gesteigert ginn a kéint an deenen nächste Joren nach klammen. Déi landwirtschaftlech Produktioun zu Lëtzebuerg, virun allem de Geméiss- an Uebstbau, entsprécht net de Besoine vun der Schoul- an Unirestauratioun. E ganze Koup wichteg Liewensmëttel, déi Restopolis fir d'Zesummesetze vu senger Plate braucht, feelen op nationalem Plang. Eng Zilsetzung, an der Schoul- an an der Unirestauratioun 100 % Produkter vu lokale Produzenten unzebidden an ze verschaffen, ass deemno illusoresch. Giff Restopolis haut nëmme mat 100 % lokale Produkter kachen, da giff de Service eng Monotonie um Teller kreéieren, déi sech negativ op d'Gesondheet vun de Gäscht auswierkt. Restopolis engagéiert sech, senger Gäscht eng Diversitéit u lokale Produkter an e Liewensmëttel-Gläichgewicht ze garantéieren.

An den nächste 5 Joer wëll Restopolis de Prozentsaz vun de lokale Produkter an senger Restauranten a Cafeteriae progressiv bis d'Joer 2025 vun 30 % op 50 % eropsetzen. Restopolis encouragéiert all déi lokal Produzenten, an deenen nächste Joren hir Produktiounskapazitéiten an d'Luucht ze setzen, fir datt méi lokal Produkter an deene Quantitéiten op de Maart kommen déi néideg sinn, fir datt an de Kantinnen a Cafeteriaen déi 50 % erreecht kënnen ginn.

All d'Kantinnen a Cafeteriae vu Restopolis bidden e grouse Choix u lokale Produkter u wéi Rëndfleesch, Schwéngfleesch, Moschert, Hunneg, Esseg, Téi, Eeër, Miel, saisonal Uebst a Geméis, Ueleg a Gedrénks. Praktesch 100 % vun de Mëllech- an de Bakprodukter, déi all d'Gäscht an de Restopolis-Restauranten a -Cafeteriaen ze kafen an z'iesse kréien, komme vu lokale Produzenten. All d'Kantinnen an d'Cafeteriae vu Restopolis verkafen a verschaffen e Minimum vun 30 % lokale Produkter.

D'Organisatioun vum lessen an den SEA fält ënnert d'Responsabilitéit vum Gestionnaire. Nieft dem Bildungsrahmenplan, dee pädagogesch Aspekter opgräift, hunn de Ministère fir Educatioun, Kanner a Jugendlecher an de Gesondheitsministère zesummen e Guide ausgeschafft, wou, ënnert anerem, Recommandatiounen ausgeschwat gi fir lokal a saisonal Produiten ze benotzen.